



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**21. Kalenderwoche – ab 23. Mai 2010**

## Bescheißfirmen

Eischendlich is das seid dor Wende so, dass mor immor irschendwie offbassn muss, dass eim keenor iebors Ohr haun dud. Da gibbds jede Menge Bescheißfirmen! Die machn nischd annersch, als sisch aushegg'n, wie mor e baar arschlose Leide einwiggln dud, damid die irschendwas koofn, wasse nisch brauchn, odor was unnorschreim, wose bis zum Lähbensende dafiehr bezahln missn... odor ooch so Buddorfahrdn, wo dir keene Buddor sondorn Lahmadeggn offgeschwadzd wern.. odor iebor Delefon, wo de was gewinn sollsd... - es dud mir jedzde gleich gahr nisch alles einfalln, wasses alles gähm dud, wo de offbassn mussd. Un de Bollezei kann nischd machn!

In de erschn Jahre nach dor Wende is das ja ganz besondorsch schlimm gewäh'n. Mir doofn Ossid warn e gefundnes Fressn fiehr alle meeschlischn Ganov'n. Isch bin ooch mindesdens e halbes Duzend ma irschendwie neingeflochn. Eema habsch eim off dor Schdraße zwee Koffor mid Beschdegge abgekoofd. Messor, Gabl, Leffl un so. Dähr had erzähld, dassor Holländor is, off dor Messe war un nu de Aussdellungschdigge loswern muss, damidor daderfiehr beim Zoll nischd bezahln missde. Die Beschdegge hamm mir heide noch. Wobei das gahr nisch so e schlesches Geschäfd gewäh'n is. Die Beschdegge dun ihm Zwegg vorrischn. Einwandfrei!

Nee, da duds Schlimmres gähm. Zum Beischbiel jedzde hads de Scheffin von meiner Schdammgneibe erwischd. Dähr hammse offgeschwadzd, dass e im Indornedz unbedingt eene eischne Hohmbeedsch brauchn dud. Ja, eene Hohmbeedsch! Das is wie e Schaufensdor im Indornedz, wo ehm alles drinne schdehn dud, was wischdisch is, wenn sisch eenor fiehr disch indressiern dud. Ohne Hohmbeedsch bisde heidzudaache e Niemand! Also, had die sisch leischd ieborredn lassn von so nedde Wessis aus Dissldorf, sisch eene Hohmbeedsch machn zu lassn. Fiehr

bloß hunnordvierzisch Euros! Das däde eene einmalische Schangse sein - so billisch! Un das däde ehm so billisch sein, weil mor dadermid Wärbung machn will... hier im Osdn! Weil mor in dähn Margd einschdeischn will... un so. Die Scheffin von meinor Schdammgneibe wollde ja schon lange eene Hohmbeedsch ham un war gligglich, iebor das ginsdische Angebot. Un obwohl se ooch e bißl misdrauisch gewähns is, se had unnorschriem un erschd hinnorhähr rischdisch gelähsn, wasse unnorschriem hadde. Die Hohmbeedsch dud bro Monad hunnordvirzisch Euros kosdn! Un das vier Jahre lang! Die is fasd umgefalln vor Gligg! Iebor achddausend Euros! Ingsesamd!

Un die sinn sowas nedd un freindlich gewähns. Isch hab ja in dor Nähe gesessn un alles mid angeheerd. Ooch bei mir had nischd gligg gemachd. Keene Alarmglogge! Die warn dährardisch bährfeggd... im Beladschorn! Wo dun die denne sowas lern?

Nascha, isch wollde schon beinahe frachn, ob isch nisch ooch eene Hohmbeedsch grischn kennde! Bei so ginsdische Breise! Nee, bassn Se bloß off - wenn jemand aus Dissldorf eene Hohmbeedsch anbietn dud! Die machn disch am Ende zum Dussl ausm Dorf!

**Eduard Sachsenmeyer**